

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 32/7

8 նոյեմբերի 2016թ.

Քննարկվեց քաղաքացի Արամ Գրիգորյանի գանգատը ՀՀ ԿԱ ՊԵԿ վարչական իրավախախտման գործի վերաբերյալ 27.09.2016թ. թիվ 334504 որոշման դեմ:

Քաղաքացի Արամ Գրիգորյանի գանգատում բերված փաստարկները.

Արամ Գրիգորյանը (այսուհետ նաև՝ գանգատաբեր) հատնում է, որ 2008թ.-ից մինչև 2015թ.-ի օգոստոսի 17-ը հանդիսացել է «Հով-Գրիգ Շին» ՍՊ ընկերության տնօրենը:

2016թ. օգոստոս ամսին Կոտայքի ՏՀՏ աշխատակիցները ստուգման հանձնարարագիր են ներկայացրել «Հով-Գրիգ Շին» ՍՊԸ-ում ստուգում իրականացնելու վերաբերյալ: Գանգատաբերն ասել է, որ արդեն 1 տարի է չի աշխատում այդ ընկերությունում, սակայն իրեն պատասխանել են, որ պետական ռեգիստրում փոփոխություն կատարված չէ, և տնօրենը հանդիսանում է գանգատաբերը, հետևապես պետք է ստորագրի հանձնարարագիրը: Գանգատաբերը ստորագրել և ստացել է հանձնարարագրի օրինակը: Այնուհետև, իրենից պահանջել են 2014-2015թ.թ. հաշվապահական փաստաթղթերը: Այդ նպատակով գանգատաբերը դիմել է ընկերության հիմնադիրներից մեկին, որը ասել է, որ փաստաթղթերը կորցրել է: Այդ մասին գանգատաբերը Կոտայքի ՏՀՏ-ում հայտարարություն է տվել, սակայն նրանք դա հաշվի չեն առել և խոչընդոտող գործողությունների վերաբերյալ արձանագրություն են կազմել:

2016թ. սեպտեմբերի 15-ին գանգատաբերը հրավիրվել է ՀՀ ԿԱ ՊԵԿ իրավաբանական վարչություն՝ վարչական վարույթին մասնակցելու համար: Ներկայանալով իրավաբանական վարչություն գանգատաբերը հայտարարություն է տվել առ այն, որ 2015թ. օգոստոս ամսից չի աշխատում «Հով-Գրիգ Շին» ՍՊԸ-ում և որպես ապացույց ներկայացրել է աշխատանքային գրքույկը, սակայն այդ հանգամանքը նույնպես հաշվի չառնվեց: Քննության արդյունքում կայացվել է թիվ 334504 որոշումը, որի համաձայն իր նկատմամբ, որպես ընկերության տնօրենի, կիրառվել է տուգանք՝ 250.000 ՀՀ դրամի չափով:

Գանգատաբերը հայտնում է նաև, որ սահմանափակ պատասխանատվությամբ ընկերությունների գործադիր մարմնի ղեկավարի փոփոխությունը կատարվում է հիմնադիրների որոշմամբ, իսկ այն իրավաբանական անձանց պետական ռեգիստրում գրանցելու համար պետք է դիմի հիմնադիրը: Քանի որ այս դեպքում հիմնադիրներն անգործություն են ցուցաբերել ու չեն գրանցել Արամ Գրիգորյանի աշխատանքից ազատելու փաստը, չնայած աշխատանքային գրքույկում կատարված գրառմանը, ուստի գանգատաբերը չպետք է պատասխանատվության ենթարկվի:

Հաշվի առնելով վերոշարադրյալը՝ Արամ Գրիգորյանը խնդրում է վերացնել իրեն պատասխանատվության ենթարկելու մասին ՀՀ ԿԱ ՊԵԿ վարչական իրավախախտման գործի վերաբերյալ թիվ 334504 որոշումը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև՝ Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ նախագահի տեղակալը քննելով 17.08.2016թ. հարկ վճարողի խոչընդոտող գործողությունների մասին արձանագրությունը և կից նյութերը, 27.09.2016թ. թիվ 8 վարչական իրավախախտման գործի վերաբերյալ արձանագրությունը պարզել է, որ ՀՀ ԿԱ ՊԵԿ նախագահի 24.06.2016թ. թիվ 1010766 հանձնարարագրի համաձայն «Հով-Գրիգ Շին» ՍՊԸ-ում պետք է իրականացվեր բյուջեի հետ փոխհարաբերությունների և հարկային մարմնի կողմից վերահսկվող ՀՀ օրենսդրության առանձին պահանջների կատարման ճշտության ստուգում: Ստուգումը փաստացի սկսվել է 04.08.2016թ-ին: Նույն օրը ստուգող տեսուչների կողմից տնօրեն Արամ Գրիգորյանին առձեռն տրամադրել են գրություն, որով պահանջվել է մեկ աշխատանքային օրվա ընթացքում ներկայացնել ընկերության սկզբնական հաշվապահական փաստաթղթերը: 05.08.2016թ-ին Արամ Գրիգորյանը ներկայացրել է հայտարարություն, որով հայտնել է, որ ինքը 17.08.2015թ-ին ազատվել է աշխատանքից: Մինչդեռ ընկերության հարկային գործում առկա տվյալների և ՀՀ արդարադատության նախարարության պետական ռեգիստրի պաշտոնական կայքից 17.08.2016թ-ին բեռնված տեղեկանքի համաձայն ՍՊԸ-ի գործադիր մարմնի ղեկավար է հանդիսանում Արամ Գրիգորյանը:

Նկատի ունենալով, որ ստուգումը հնարավոր չէր իրականացնել առանց անհրաժեշտ փաստաթղթերի ներկայացման և ղեկավարվելով ՀՀ կառավարության 29.07.2010թ. թիվ 972-Ն որոշմամբ սահմանված կարգով, 17.08.2016թ. ստուգման հանձնարարագրում ընդգրկված հարկային ծառայողների կողմից կազմվել է խոչընդոտող գործողությունների վերաբերյալ 1010766 արձանագրությունը:

Փաստի կապակցությամբ հարուցվել է վարչական վարույթ: Արամ Գրիգորյանը 15.09.2016թ. ներկայացել է վարույթի քննությանը և տվել է բացատրություն, համաձայն որի 2015թ. օգոստոս ամսից ազատված է «Հով-Գրիգ Շին» ՍՊԸ-ի տնօրենի պաշտոնից, ինչի մասին աշխատանքային գրքույկում առկա է գրառում: Արամ Գրիգորյանը հայտնել է նաև, որ 29.07.2016թ. այցելել է պետական ռեգիստրի գործակալություն, պարզելու համար թե ինչու չի կատարվել տնօրենի փոփոխությունը, սակայն պետական ռեգիստրում իրեն հայտնել են, որ փոփոխությունները կատարվում են որոշման հիման վրա, որը պետք է ներկայացվեր ընկերության հիմնադիրների կողմից:

Հիմք ընդունելով «Իրավաբանական անձանց պետական գրանցման, իրավաբանական անձանց առանձնացված ստորաբաժանումների, հիմնարկների և անհատ ձեռնարկատերերի պետական հաշվառման մասին» ՀՀ օրենքի 26-րդ հոդվածի 1-ին մասի 21-րդ կետը և նկատի ունենալով, որ ՀՀ ԱՆ իրավաբանական անձանց պետական ռեգիստրի էլեկտրոնային կայքում առկա տեղեկության համաձայն Արամ Գրիգորյանը հանդիսանում է «Հով-Գրիգ Շին» ՍՊԸ տնօրեն և նրա կողմից ստուգող տեսուչներին ստուգման նպատակին և ստուգմամբ ընդգրկված հարցերին առնչվող փաստաթղթեր չտրամադրելը դիտվում է ստուգման ընթացքը խոչընդոտելուն ուղղված գործողություններ, ՀՀ ԿԱ ՊԵԿ նախագահի տեղակալի կողմից 27.09.2016թ. կայացվել է վարչական իրավախախտման գործի վերաբերյալ

թիվ 334504 որոշումը, որով «Հով-Գրիգ Շին» ՍՊԸ տնօրեն Արամ Գրիգորյանի նկատմամբ կիրառվել է Վարչական իրավախախտումների վերաբերյալ ՀՀ օրենսգրքի 182¹-րդ հոդվածով նախատեսված պատասխանատվության միջոցը՝ գումարով 250.000 դրամի չափով:

Վերոգրյալի կապակցությամբ հարկ է նշել, որ «Իրավաբանական անձանց պետական գրանցման, իրավաբանական անձանց առանձնացված ստորաբաժանումների, հիմնարկների և անհատ ձեռնարկատերերի պետական հաշվառման մասին» ՀՀ օրենքի 26-րդ հոդվածի 1-ին մասի 21-րդ կետի համաձայն՝ իրավաբանական անձանց պետական գրանցման գրանցամատյանում գրառվում են տեղեկություններ իրավաբանական անձի գործադիր մարմնի ղեկավարի կամ իրավաբանական անձի գործադիր մարմնի ղեկավարի պաշտոնակատարի մասին:

Նույն հոդվածի 13-րդ մասի համաձայն՝ սույն հոդվածի 1-ին մասի 21-րդ կետով սահմանված տեղեկությունները պարտադիր գրառման ենթակա են փոփոխությունների պետական գրանցման ժամանակ, ինչպես նաև այն դեպքում, երբ նոր գրանցվող (ստեղծվող) իրավաբանական անձի հիմնադիր ժողովը (համագումարը կամ օրենքով սահմանված այլ մարմինը) կամ հիմնադիրը ընտրել (նշանակել) են իրավաբանական անձի գործադիր մարմնի ղեկավար:

Քննարկվող դեպքում Արամ Գրիգորյանը, որպես «Հով-Գրիգ Շին» ՍՊԸ տնօրեն, 17.08.2015թ-ին ազատվել է զբաղեցրած պաշտոնից, ինչի մասին նրա աշխատանքային գրքույկում կատարվել է համապատասխան գրառում: Ընդ որում հարկ է նշել, որ իրավաբանական անձանց պետական գրանցման գրանցամատյանում իրավաբանական անձի գործադիր մարմնի ղեկավարի փոփոխության վերաբերյալ գրառում կատարելու նպատակով համապատասխան տեղեկությունները պետք է ներկայացնեն ընկերության հիմնադիրը, ինչը, սակայն չի կատարել:

Հանձնաժողովը գտնում է, որ իրավաբանական անձանց պետական գրանցման գրանցամատյանում տնօրենի փոփոխության վերաբերյալ գրառում չկատարելու հանգամանքը չի կարող հիմք հանդիսանալ Արամ Գրիգորյանին որպես «Հով-Գրիգ Շին» ՍՊԸ տնօրեն դիտարկելու և ստուգմանն առնչվող փաստաթղթերը չներկայացնելու համար նրա նկատմամբ Վարչական իրավախախտումների վերաբերյալ ՀՀ օրենսգրքի 182¹-րդ հոդվածով նախատեսված պատասխանատվության միջոցը կիրառելու համար:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

Անվավեր ճանաչել ՀՀ ԿԱ ՊԵԿ վարչական իրավախախտման գործի վերաբերյալ 27.09.2016թ. թիվ 334504 որոշումը:

Հանձնաժողովի նախագահ՝



Վ.ՄԻՐՈՒՄՅԱՆ